

HUKUM PENGGUNAAN DANA ZAKAT DI BAWAH ASNAF FISABILILLAH

Zakat merupakan salah satu rukun Islam. Kewajipan melaksanakannya telah ditegaskan dalam al-Quran, hadis, dan ijmak. Zakat dikategorikan oleh ulama' sebagai ibadat harta dan juga ibadat badan seperti solat. Ganjaran pelaksanaannya ialah kesucian serta keberkatan harta di dunia ini, di samping pahala yang dijanjikan oleh Allah *Subhanahu wata'ala* di akhirat.

Zakat menurut bahasa ialah berkembang dan bertambah. Orang Arab mengatakan *zakkaa az-zar'u* iaitu apabila tanaman itu berkembang dan bertambah hasilnya. Demikian juga mereka menyebut *zakat an-nafaqah* apabila perbelanjaan (nafkah) menjadi berkat. Zakat juga dikenali dengan makna suci. Firman Allah *Subhanahu wata'ala*:

قَدْ أَفْلَحَ مَنْ زَكَّاهَا

Maksudnya: "Sesungguhnya beruntunglah orang yang mensucikannya (jiwa itu)."

(Surah asy-Syams 91:9)

Allah *Subhanahu wata'ala* telah menetapkan asnaf yang berhak menerima zakat itu daripada lapan golongan sepertimana firman-Nya yang bermaksud: "Sesungguhnya sedekah-sedekah (zakat) itu hanyalah untuk orang-orang fakir, dan orang-orang miskin, dan amil-amil yang mengurusnya, dan orang-orang muallaf yang dijinakkan hatinya, dan untuk hamba-hamba yang hendak memerdekakan dirinya, dan orang-orang yang berhutang dan untuk (dibelanjakan pada) jalan Allah, dan orang-orang musafir (yang terputus bekalan) dalam perjalanan. (Ketetapan hukum yang demikian itu ialah) sebagai satu ketetapan (yang datangnya) dari Allah. Dan (ingatlah) Allah Maha Mengetahui, lagi Maha Bijaksana".

(Surah At-Taubah 9:60)

JABATAN MUFTI SARAWAK

Para ulama' menerangkan tentang penggunaan zakat bagi golongan asnaf fisabilillah seperti berikut:

1. Menurut al-Kasani, dalam kalangan asnaf itu ada disebut fisabilillah (untuk kepentingan di jalan Allah *Subhanahu wata'ala*) atau urusan-urusan lain yang termasuk dalam skopnya. Oleh sebab itu, semua gerak kerja dalam melakukan ketaatan kepada Allah *Subhanahu wata'ala* dan jalan-jalan kebaikan apabila diperlukan boleh dikategorikan sebagai kepentingan fisabilillah. Hal ini kerana fisabilillah itu bersifat umum yang

merangkumi pelbagai aspek seperti pembangunan masjid dan sebagainya. Anas *Radhiallahu 'anhu* dan al-Hasan berkata, “Apa yang diberikan untuk pembangunan jambatan dan jalan termasuk sedekah.”

2. Imam ar-Razi dalam tafsirnya, menyatakan bahawa zahir lafaz pada perkataan *fi sabilillah* dalam ayat 60 surah at-Taubah itu tidak wajar dikhususkan kepada maksud orang yang berperang semata-mata. Beliau kemudian memetik bahawa al-Qaffal dalam tafsir beliau telah menyebut pandangan beberapa fuqaha bahawa zakat boleh dibelanjakan untuk apa sahaja tujuan kebaikan, termasuk menyempurnakan (mengkafankan) jenazah, membina benteng atau kubu pertahanan dan membina masjid.
3. Sadiq Hasan Khan dalam ar-Rawdah an-Nadiyyah menyatakan bahawa walaupun jihad pada jalan Allah *Subhanahu wata'ala* adalah sebesar-besar jalan untuk mendekatkan diri kepada Allah *Subhanahu wata'ala*, tetapi tidak terdapat dalil yang mengkhususkan maksud lafaz *fi sabilillah* kepada makna perang di jalan Allah *Subhanahu wata'ala* semata-mata, sebaliknya ia boleh ditafsirkan dengan maksud apa sahaja perbuatan yang boleh mendekatkan diri kepada Allah *Subhanahu wata'ala*.
4. Ada pandangan fuqaha yang mengharuskan kutipan zakat digunakan dalam perkara-perkara yang boleh mendekatkan diri kepada Allah *Subhanahu wata'ala* maka diharuskan kutipan zakat ini diberi kepada golongan ulama' walaupun mereka terdiri daripada golongan kaya. Ini kerana golongan ulama' berjuang untuk mendidik anak bangsa dalam soal-soal keagamaan. Justeru, mereka juga berhak dalam soal agihan kutipan zakat tanpa mengira sama ada mereka ini daripada golongan kaya atau miskin. Selain itu, membelanjakan agihan kutipan zakat kepada ulama' dalam soal *fi sabilillah* adalah sebaik baik perkara kerana para ulama' adalah pewaris para nabi, di tangan merekalah terpelihara syariat Islam.
5. Al-Syeikh Mohamad Rashid Reda mentafsirkan lafaz *fi sabilillah* dengan memasukkan penyediaan tentera, makanan tentera, pengebumian jenazah tentera, mendirikan hospital tentera, hospital awam dan semua yang berkaitan dengan kepentingan umum sebagai layak menerima pembiayaan zakat dari asnaf *fi sabilillah*. Guru-guru yang mengajar ilmu-ilmu syariah dalam bidang agama juga boleh menerima pembiayaan zakat dari asnaf

fisabilillah selama mana mereka tidak menerima pembiayaan daripada sumber lain kerana ia juga termasuk dalam kategori kepentingan umum.

6. Al-Syeikh Muhammad Shaltut dalam mendefinisikan *al-Masolih al-'Ammah*, beliau menerangkan bahawa yang dimaksudkan *al-Masolih al-'Ammah* adalah sesuatu yang bukan milik individu tertentu, bukan juga terhad manfaatnya terhadap individu tertentu, ia adalah milik Allah *Subhanahu wata'ala* dan manfaatnya adalah untuk semua makhluk Allah *Subhanahu wata'ala* seperti menyediakan askar untuk bertindak terhadap pemberontak, membina hospital tentera dan awam, membuat dan memperbaiki jalan, menyambung atau membina landasan kereta api, menghantar para pendakwah Islam dan kerja-kerja menjaga kehormatan dan kemuliaan al-Quran. Selain itu, manfaatnya juga untuk membina masjid yang belum ada di dalam sesuatu kariah atau membina masjid yang kedua dengan syarat masjid yang sedia ada tidak mampu untuk menampung jemaah yang ramai dan memerlukan pembinaan masjid baharu atau memperbaiki masjid yang sedia ada.
7. Al-Qaradhawi menyebut bahawa pengertian fisabilillah dalam ayat pengagihan zakat ialah jihad sepertimana pendapat jumhur. Beliau juga tidak mengehadkan jihad dengan makna peperangan semata-mata. Bahkan memperluaskan jihad dalam bentuk pemikiran, pendidikan, penulisan, perekonomian, politik, kemasyarakatan dan sebagainya. Apa yang penting adalah untuk meninggikan kalimah Allah *Subhanahu wata'ala* dan mempertahankan Islam. Antaranya mendirikan pusat dakwah yang memberi kefahaman Islam yang betul dan menyampaikan ajaran Islam kepada bukan Islam, mendirikan pusat-pusat pendidikan, menubuhkan kilang-kilang percetakan untuk menerbitkan serta menyebarkan risalah-risalah dan buku-buku Islam. (Fiqh al-Zakat, 2/666-681)

JABATAN MUFTI SARAWAK

Berdasarkan pandangan ulama' mengenai penggunaan zakat asnaf fisabilillah, maka ia adalah diharuskan untuk digunapakai bagi tujuan kebaikan umat Islam. Oleh itu, Mesyuarat Lembaga Fatwa Negeri Sarawak yang bersidang pada 19 Safar 1442 bersamaan 7 Oktober 2020 telah memutuskan mengenai Hukum Penggunaan Dana Zakat Di Bawah Asnaf Fisabilillah adalah seperti berikut:

Harus menggunakan wang zakat di bawah asnaf fisabilillah untuk apa-apa tujuan yang bertepatan dengan kehendak syarak dengan melihat kepada keperluan atau keutamaan terhadap permohonan yang diterima setelah mendapat kelulusan Mufti.

